



La naiv e las energias regenerablas

Michael Lehning dad SLF a Tavau ha referì a Mustér davart novas strategias d'energia.

4



Val S. Pieder vul novas structuradas turisticas

Las organisaziuns turisticas existentas a Val S. Pieder duain vegnir fusiunadas.

5

Fögl Ladin

GASSETTA ROMONTSCHA

CASA PATERNA/LA PÜNT

LA VOUSCH DA SURMEIR



LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

«Go, Institut Otalpin Ftan, go»

■ (anr/fa) Dürant l'on da scoula 2016/17 vaivan introduit ils respunsabels da l'Institut Otalpin Ftan SA (IOF) la strategia dad internaziunalisar sias sportas da scolaziun. Il böt es d'acquirit scolares e scolars eir dad oters pajais. In sonda ha salvà l'IOF sia 104avla radunanza generala. In quell'ocasiun han ils novs manaders da la scoula, Beat ed Ursula Sommer, e Jon Peer chi

presidiescha il cussagl administrativ dit chi's cuntinuescha consequaintamaing cun quista strategia. Il prossem böt es da survgnir il permiss da pudair spordscher la matura internaziunala, il International Baccalaurete. Ils acziunaris preschaints han express lur sustegn per quist intent.

> PAGINA 7

«Be entupà schuldads motivads»

DA GION NUTEGN STGIER / ANR

■ **Trais Grischuns fan ina bilantscha positiva da l'occurranza internaziunala.** Quai èn Lucas Caduff, il cumandant da la Divisiun territoriala 3, Tarzisius Caviezel, il landamma da Tavau, e cusseglier guvernativ Peter Peyer. Per la fin dal Forum mundial d'economia 2019 ha divisiunari Lucas Caduff envidà las instanzas politicas dal chantun, da Tavau e represchentants da la polizia chantunala ad in'occurranza finala. Gi lieu ha quella sur la vischnanca da Tavau en la «Thur-

gauer Höhenlinik», il quartier da 300 schuldads ed uffiziers da la divisiun. En ses plets ha il divisiunari sursilvan cunzunt ludà la collavuraziun excellenta cun la vischnanca da Tavau, cun la polizia chantunala e lura er cun il chantun. Ultra da quai ha el be chattà buns plets per ses schuldads. Avant e durant il Forum mundial d'economia haja el be entupà umens motivads, plain passiuun per l'occurranza e cun in grond engaschament e quai durant 24 uras.

> PAGINA 2



Lucas Caduff (a san.) cun ses dus giasts cusseglier guvernativ Peter Peyer (a mez) e landamma Tarzisius Caviezel.

FOTO G. N. STGIER

Interessantas lavurs dils maturands

■ (anr/hh) Las scolares ed ils scolars dalla sisavla classa dil gimnasi da Mustér ein ella fasa finala da lur examens dalla matura. Ina part da quels ei la lavur da matura e quella han els stuiu furnir a lur magisters igl atun vargau. Dacuort ein ellas vegnidas giudicadas e sco mintg'onn ei ina part dad ellas vegnida presentada publicamein.

Quella presentaziun ha giu liug il venderdis sera el gimnasi. Il spectrum dallas lavurs ei fetg vast: Interessants temas regiunals entochen globals cun cuntegns davart las scienzas naturalas e humanas, mo era temas dallas musas, dalla historia e dalla tecnica.

> PAGINA 4

Pusseivel mo cun trasparenza

Ils tscheins d'aua han dau da discutir als «dis davart la perscrutaziun d'energia» a Mustér

DA HANS HUONDER / ANR

■ **Ils representants dallas vischnauncas e dils cantuns da concessiun pretendan dallas ovras electricas trasparenza pertuccont lur cuosts. Quella seigi necessaria per anflar ina soluziun en connex culs tscheins d'aua futurs.** Duront treis dis ein scienziai, perscrutaders, representants dall'economia e dalla politica sefatschentai a Mustér dalla produziun d'energia electrica egl avegnir. En rondund 30 referats ed in arranschament public ein models e pusseivladads vegni discutai. Sper econuschientschas novas e tecnologias futuras per la produziun d'energia han era ils tscheins d'aua dau da discutir. Ina ga daplì. Fertion ch'ils representants dallas vischnauncas concessiunaras e dils cantuns pretendan era egl avegnir in tscheins silmeins ella dimensiun dad ussa pretendan ils representants dallas ovras electricas cumpromiss per anflar ina soluziun. Pil secretari general dalla conferenza dallas regenzas dils cantuns da muntogna, Fadri



Ils tscheins d'aua fatschantan il mument ils gremis politics en Svizra e cun els era ils representants dallas vischnauncas concessiunaras e dils cantuns sco era dallas ovras electricas.

FOTO H. HUONDER

Ramming, eis ei denton clar: «Sche nus lein anflar ina soluziun drova ei trasparenza da cuosts.» E Walter Deplazes, commember

dalla suprazion dalla Cuminonza d'interess dallas vischnauncas da concessiun grischunas, puntuescha: «Senza ina relaziun da

confidonza vegn ei buc a dar aschi spert in niev model.»

> PAGINA 3

Livio Bieler e Seraina Boner

Victorias suveranas al 30avel Surselva Maraton

■ (anr/gv) **Cun Livio Bieler sa il Surselva Maraton nudar in niev num ella gliesta dils victurs.** Il currier da 25 onns da Panaduz ha absolviu in'excelenta cuorsa da trenament e teniu ses concurrents sin distanza. Gia cuort suenter la partenza hai dau negins dubis da sia finamira. Suenter tschun kilometers ha Bieler allura distanziau siu davos concurrent. Se-

raina Boner da Clastra ha gudignau suenter il 2009 e 2010 la tiazza cuorsa a Sedrun. Ella ha schau sias concurrentas tschun minutas e daplì davos ella. La victoria ei turnada el final ensem cun Sascha Deplazes da Sedrun e Janic Camathias da Sagogn. Da cundiziuns ordvart emperneivlas ein 200 curridras e curriders separticipai al maraton da giubi-

leum. Dus indigens da 17 onns han procurau ier als aspectatur per grond plascher. Cla Ursin Nuffer e Fadri Luis Schmid han absolviu la cuorsa per la pli gronda part ensem cun Curdin Perl da Puntraschigna e Kevin Marc Camathias da Sagogn. Perl ei daventaus quart, Nufer tschunavel.

> PAGINA 5



Seraina Boner e Livio Bieler ein ils victurs dil 30avel Surselva Maraton.

FOTO G. VENZIN



Servetsch d'abunents e da distribuziun: tel. 0844 226 226 mail: abo@somedia.ch



Il secretari general dalla conferenza dallas regenzas dils cantuns da muntogna, Fadri Ramming, ha plidau in clar lungatg en connex cun las contractivas davart in niev model per ils tscheins d’aua.

FOTOS H. HUONDER



Il representant dalla Cuminonza d’interess dallas vischnauncas da concessiun grischunas, Walter Deplazes, ha suttastrihau l’impurtonza dalla trasparenza da cuosts en connex cun in niev model pils tscheins d’aua.

Ils tscheins d’aua – in’indemnisaziun pli che giustificada

Igl arranschament public dils «dis da discussiun davart la perscrutaziun d’energia» a Mustér ei staus ell’enzenna dalla forza hidraulica

DA HANS HUONDER / ANR

■ Dapi ch’ils prezis per l’energia electrica ein curdai ein ils tscheins d’aua medemamein sut squetsch. Pils representants dallas vischnauncas e dils cantuns pertuccai eis ei clar: Ina buna indemnisaziun per l’aua sto esser garantida era egl avegnir, denter auter per animar da prolungir las concessiuns. Per la quarta ga han ils «dis da discussiun davart la perscrutaziun d’energia» giu liug en claustra a Mustér. Els ein danovamein vegni organisai dalla Fundaziun Center da perscrutaziun d’energia alpin (AlpEnForCe). Duront ils treis dis han ils organisaturs cul meinafatschenta e vicepresident dalla fundaziun Ivo Schillig alla testa purschiu biebein 30 referats e leutier – sco ils davos onns era – in arranschament public. Il tetel da quel: «Tscheins d’aua – model da success ni impediment?» Quater representants da differentas instituziuns ein s’exprimi: Werner Hediger dalla Scol’aula per tecnica ed economia Cuera, Fadri Ramming, secretari general dalla conferenza dallas regenzas dils cantuns da muntogna, Dominique Martin, commember dalla direcziun dall’Associaziun dallas interpretas d’electricitad dalla Svizra e Walter Deplazes, commember dalla suprastanza dalla Cuminonza d’interess dallas vischnauncas da concessiun grischunas. Els han buca mo presentau lur pugns da vesta, mobein era debattau silsuenter en ina discussiun al podi.

Forza hidraulica ei indispensabla
Bunamein 60 pertschien dall’energia che vegn producida en Svizra deriva dalla forza hidraulica. Quell’aua s’auda als cantuns e persuerter obtegnan els in tscheins d’aua che vegn la finfinala dabien era allas vischnauncas concessiunaras. Ils davos onns ein quels tscheins vegni sut squetsch, en emprema lingia pervia dils prezis d’energia ch’ein serecuci. «En sesez ein quels tscheins stai dispiteivels dapi l’entschatta», di Hediger. Dapi 1916 han els vigur ed ein schizun stipulai ella Constituziun federala. Dapi entgins onns – vul dir dapi che las ovras documenteschan meins gronds gudogns, respectivamein deficits – ein quels tscheins sut squetsch: «Differentes models vegnan discutai il mument, denter auter in cun ina contribuziun ferma ed in’ulteriura contribuziun flexibla tenor differentes criteris.» Pli bass tscheins muntassen entradas reducidas per biaras vischnauncas era grischunas. Cheutras mass substantza finanziaria a piarder ch’ei d’eminenta impurtonza per mantener l’infrastructura ed aschia salvar ils vitgs attractivs per viver.

Fiera sfalsificada
Vehementamein ha Ramming defendiu la gievgia suentermiezdi ella Sala Peter Kaiser dalla claustra a Mustér ils interess dallas vischnauncas e dils cantuns da muntogna: «In dils gronds problems che fatschentan il mument la fiera d’energia en Svizra ein las 23 milliardas francs che la Germania impunda annualmein en

favur dalla promoziun dall’energia. Quei ei ina dimensiun ch’influenzescha era ils prezis dall’energia e sfalsifiescha aschia la fiera.» Il mument ei la branscha d’energia denton aunc confruntada cun biaras autras midadas: La revisiun dalla lescha dil provediment d’energia, la cunvegnientscha da rama cun l’Uniuon europea, la digitalisaziun ed ils cuors dallas valutas, novs products ed il svilup dalla tecnica. Per Ramming ei l’introducziun dil tscheins d’aua a sias uras stada en favur dil svilup dall’industria ella Bassa e dalla viafier: «Ils tscheins ein vegni fixai lu aschia ch’els ein stai attractivs per quellas novaziuns. Quei ei stau in segn da solidaritad era dils cantuns e dallas vischnauncas ch’ein stadas prontas da metter a disposiziun lur aua per la forza hidraulica. Oz denton plaidan tuts mo dalla solidaritad dils cantuns dalla Bassa culs cantuns da muntogna cura ch’ei va per discutir ils tscheins d’aua. Ils tscheins d’aua ein ina clav pil success dalla nova strategia d’energia 2050.» Per Ramming eis ei clar: «Sch’ils tscheins d’aua duein esser era egl avegnir in model da success sche drova ei soluziuns cumineivlas che vegnan purtadas da tuts. Leutier s’audan la trasparenza ed informaziun cumpleina, era davart las ovras electricas.» Il tscheins d’aua actual da 110 francs per kilowatt ha vigur aunc entochen la fin da quest onn, silsuenter ston novas soluziuns vegnir anfladas. Sco ei ves’ora il mument savess quei prezi restar entochen la fin 2024, mo lu savess el vegnir remplazzaus d’in model flexibei cun in

sochel ed in’ulteriura contribuziun tenor differentes criteris. Tenor Ramming ei quei model decisivs era en vesta a prolungaziuns da concessiuns.

Anflar cumpromiss
Martin – il representant dallas interpretas d’electricitad dalla Svizra – ch’ha giudau d’entellir dacuort ch’il tscheins d’aua seigi digns pil museum – ha defendiu la gievgia ils interess dalla branscha. Las midadas sil sector dalla fiera d’energia seigien stadas considerablas ils davos onns. Fertion ch’ils prezis per energia seigien serecuci seigien ils tscheins d’aua sedublegiai ils davos 20 onns. Quei hagi influenzau ils quens dallas ovras: «En connex cun novs models pils tscheins d’aua ha ei num anflar cumpromiss. Igl ei da risguardar plazs da lavur, mo lu era l’impurtonza dalla forza hidraulica ella concorrenza internaziunala. Per saver mantener quei standard duvrein nus denton era concessiuns novas.» Si’associaziun propona in model flexibei: «Ei drova ina part fixa ed ina variabla cun risguard dalla realitad dils prezis dalla fiera, mo era cun risguard dils interess dallas vischnauncas e dils cantuns. Il medem mument stuein nus tener quen dalla grond’impurtonza dalla forza hidraulica. La forza hidraulica ei numnadamein da relevanza pil sistem dil provediment electric en Svizra.»

Claras pretensiuns
Avon rodund siat onns ei la Cuminonza d’interess dallas vischnauncas da con-

cessiun dil Grischun vegnida fundada, ella dumbra 43 vischnauncas. En connex cun las discussiuns davart ils tscheins d’aua plaida Deplazes d’in cumbat «David encunter Goliat»: «Schegie ch’ils tscheins d’aua vegnan a restar ils proxims quater onns sil nivel dad uss e tenor il sistem actual ha ei num tscherchar soluziuns e buca ruassar.» Era el constatescha ch’ils cantuns da muntogna han cun lur aua subvenziunau il svilup industrial en Svizra l’entschatta dil 20avel tschentaner. Deplazes fa denton aunc surstar cun in’autra cefra: «Da 1996 entochen 2016 han las ovras electricas en Svizra nudau in gudogn schuber total da 30 milliardas francs.

En temps da gronds gudogns han ins mai udiu dad ellas ch’ei fussi indicau d’alzar ils tscheins d’aua. D’ina reducziun plaidan ins denton fetg spert quei mument ch’il gudogn ei buc aschi aults sco quei ch’ins vul.» Il tscheins d’aua da 110 francs seigi buca surfatgs ed ins sappi constatar ch’ils prezis dall’energia s’augmentien puspei. Sco Ramming pretenda era Deplazes trasparenza en connex cun las contractivas davart in niev model dil tscheins d’aua: «Senza ina relaziun da confidanza vegn ei buc a dar in niev model aschi spert. Nus essan prompts da sediscuorer.» Senza ils tscheins d’aua damenti il squetsch finanziel sin las vischnauncas – denter auter en connex cun la depopulaziun – aunc bia pli gronds. Ils disavantatgs da biaras vischnauncas en muntogna prenessien ina nova dimensiun.



Dominique Martin, commember dalla direcziun dall’Associaziun dallas interpretas d’electricitad dalla Svizra, ha suttastrihau l’impurtonza dalla forza hidraulica, mo il medem mument era accentuau la necessitad d’anflar in cumpromiss en connex culs tscheins d’aua.



La discussiun al podi. Da seniester Werner Hediger, Fadri Ramming, Dominique Martin e Walter Deplazes.

La rolla dalla neiv en connex cun energia regenerabla

Michael Lehning digl Institut per la perscrutaziun da neiv e lavinas (SLF) a Tavau ha referiu a Mustér

DA HANS HUONDER / ANR

■ La nova strategia d'energia dalla confederaziun, mo era la midada dil clima fatschentan il mument intensivamein la scienza, mo era la pratica.

El rom dils «dis da discussiun davart la perscrutaziun dall'energia» a Mustér ha *Michael Lehning* digl Institut per la perscrutaziun da neiv e lavinas (SLF) a Tavau presentau in interessant studi davart la rolla dalla neiv en connex cun la produenziun d'energia regenerabla.

«La Svizra semida fermamein ed ella vegn a semidar vinavon. A quei svilup attribueschan ils dus facturs che pertuccan la midada dil clima sco era la midada dil strategia dall'energia. La muntogna ei pertuccada essenzialmein da quels dus facturs», di Lehning. En in referat als «dis da discussiun davart la perscrutaziun dall'energia» en claustra a Mustér eis el sefatschentaus en quei connex dalla rolla che la muntogna, en special denton la neiv, gioga en connex cun quellas midas che semantifesteschan il mument.

Tgei rolla gioga la neiv?

Lehning ch'ei responsabels al SLF per process da neiv e scheltira permanenta ha tematisau ils aspects dalla muntada dalla neiv en connex cun la produenziun d'energia, mo era co la midada dil clima vegn a s'effectuar sin la neiv. El ed ulteriurs perscrutaders ein sefatschentai oravontut dallas pusseivladads futuras dalla produenziun d'energia solara ellas muntognas.

En quei connex ei setschentada surtut la damonda co la neiv – respectivamein la reflexiun da quella – sa vegnir nezegiada il pli efficient. Sebasond sin l'installaziun d'indrezs da solar ellas muntognas svizras ei vegniu elavurau scenaris da produenziun d'energia cun agid da sulegl, vent ed aua che savess remplazzar plaun a plaun l'energia atomara producida en Svizra. Dallas



Michael Lehning favorisescha indrezs solars en regions alpinas. Tals savessen contribuir essenzialmein egl avegnir alla produenziun d'energia en Svizra.

FOTO H. HUONDER

examinaziuns fatgas ei semussau ch'il potenzial per la produenziun d'energia surtut solara ei grond. Tenor Lehning fuss ei pusseivel da cuvieren cun ina surfatscha da 42 kilometers quadrat da fotovoltaica rodond ina quarta digl entir consum d'electricitad en Svizra, vul dir remplazzar cumpleinamein las ovrar atomaras existentas. Sin quella surfatscha fuss ei pusseivel da producir annualsein 12 terawatt/uras.

Muntognas ein predestinadas

Sin fundament dallas cundiziuns che regian en muntogna ei la produenziun d'energia solara leu in bien ton pli adattada ch'ella Bassa. «Abstrahau dalla reflexiun

dalla neiv havein nus leu era buca tonta nebla ch'impedescha la produenziun», di Lehning. Ins ha denton aunc constatau in auter effect: «Era tier in tschiel serein sereducescha l'irradiaziun dil sulegl significantamein pli a bass ch'ins va. Quei vul dir ch'ella ei pli gronda ell'altezia ch'ella Bassa.» Las examinaziuns muossan ch'igl ei pusseivel da contonscher ellas Alps rodond 20 pertschien dapli produenziun d'energia ch'els marcaus.

La cozza da neiv stagiunala augmenta la produenziun annuala aunc ina ga per rodond diesch pertschien. «La cozza da neiv ella muntogna ha plinavon igl effect ch'ils moduls da solar san vegnir installai en ina pendenza pli teissa ed ein cheu-

tras buc aschi marcants en lur cumparsa», constatescha Lehning.

Energia digl unviern

Tenor Lening ei la cumpensaziun dall'energia atomara en Svizra cumpleinamein realistica sin fundament dil nez da novas fontaunas d'energia regenerabla: «Ei dat biaras pusseivladads da cumbinaziun che meinan a quella finamira.» In'impurtonta rolla en quei connex savess l'energia solara giugar, leutier l'energia producida cun agid dil vent ni la geotermia. Cun ina capacitad da 13 gw d'energia solara ei in menaschi stabil dalla reit d'electricitad svizra pusseivels. Leutier duvrass ei in'installaziun da moduls cun ina surfatscha

dad 80 kilometers quadrat. «Aschia stuess buca vegnir importau dapli electricitad ch'ussa ed il squetsch sils indrezs da transmissiun sereducess schizun ella media», di Lehning. Il volumen da commerci cuagl exterior s'augmentass tonaton pil dubel. Tier in surproduenziun vegness ei exportau dapli ch'oz ed ei fuss cheutras era necessari da cumprar anavos dapli energia. «Las retschercas muossan che la midada dalla strategia d'energia ei pusseivla schizun cun ina fetg pintga cumpart dalla geotermia e l'energia da vent», constatescha el. Cun in nez pli intensiv dall'energia regenerabla sco per exempel la solara savess la Svizra salvar si'autonomia e stabilitad dil sistem energetic.

Da meins neiv

Tenor models elavurai ils davos onns vegn la midada dil clima a purtar alla Svizra egl avegnir dameins neiv igl unviern, persunter dapli plievgia. Quei savess haver in effect negativ denter auter sil turissem d'unviern. Schebein ei vegn a dar la stad dameins precipitaziuns sco prognosticau ei denton ina damonda dispeivla. Cheutras duess la produenziun d'energia hidraulica esser garantida ed aschia era contribuir pli fetg al consum d'energia igl unviern. Tenor Lehning ston ils indrezs per la produenziun d'energia solara vegnir piazzai aschia ch'els san nezegiar optimalmein l'irradiaziun dil sulegl e la reflexiun dalla neiv: «Damai che la cozza da neiv vegn a star stabila en regions propi aultas era egl avegnir ston indrezs solars vegnir favorisai leu. Per impedir ch'il maletg dalla cuntrada piteschi duess ins ponderar da nezegiar persunter loghens cun lavineras. En biars cass sesanflan lavineras leu nua ch'il sulegl ei era fermes e nua ch'ei ha era bia neiv.» Ina dallas damondas essenzialas ch'ei aunc buca rispundida en quei connex ei quella dil transport dall'energia naven dil liug da produenziun el liug da distribuziun, respectivamein dil diever.

150 francs chasti per disturbar selvaschina

■ (rtr) Ils survegliaders da chatscha pon far er controllas en il territori da skis dad Andermatt-Alpsu. Tgi che va en las zonas da ruaus da la selvaschina sto quintar cun ina multa. Persunas che disturban las zonas da repaus en il chantun Uri ston pajar in chasti da 150 francs. Surtut las fins d'emna, durant il temp da vacanzas u er ils dis suenter ch'igl ha navi vegnan fatgas las controllas. Sco *Josef Walker* da l'Uffizi da guaud e chatscha dal chantun Uri ha ditg na dati naginas zonas che van sur ils cunfins dals dus chantuns Uri e Grischun.

reclama

Überflüssig & unnütz!

„Nein zur Zersiedlungsinitiative, weil sie Kantone und Gemeinden bevormundet.“



Werner Hösl
Ständerat SVP/GL

Radikale Zersiedlungs-Initiative NEIN

HEV Schweiz

www.radikale-zersiedlungs-initiative-nein.ch
HEV Schweiz, Postfach, 8032 Zürich

Temas locals entochen globals – digl art ed il nutriment

Maturandas e maturands dil gimnasi da Mustér han presentau publicamein lur lavurs da matura

DA HANS HUONDER / ANR

■ Per las scholaras ed ils scholars dalla sisavla classa va il temps da scola al gimnasi plaun a plaun a fin. In dils puncts culminonts da lur examens finals ein las lavurs da matura. Sco ils onns passai era ha la direenziun dil gimnasi dalla claustra da Mustér envidau la populaziun alla presentaziun d'entginas lavurs da matura. Ellas stanzas dalla scola han ils interessents giu la caschun d'intervegnir entgens detagls da 20 lavurs. Igl ei circa la mesadad da tut quellas ch'ei vegnidas screttas uonn da scholaras e scholars dil gimnasi da Mustér. Suenter la presentaziun eis ei denton era stau pusseivel da tschentar damondas allas maturandas ed als maturands ed aschia da vegnir directamein en contact cun quels. Il spectrum geografic dallas lavurs ei staus fetg vast: Interessants temas regiunals entochen globals cun cuntengs davart las ciencias naturalas e humanas, mo era temas dallas musas e la historia.

Dalla historia ed igl art...

Aschia ha la scolara *Anna Manetsch* rimnau reacziuns da vischinas e vischins da Trun davart il temps dalla Secunda Uia-ra mundiala ed *Andrea Russi* ha tematisau ils motivs ch'han menau al naufragi

dalla Porta Alpina, respectivamein ils aspects che quella vegni tonaton aunc realisada in mument. *Xenia Riedi* ei sefatschentada dil Bogn Tenigia e *Gian-Andrea Huonder* dalla historia dil hotel Disentiserhof. In'interessanta lavur ei vegnida fatga da *Lorena Cadalbert*. Ella ha priu sut la marella igl effect dalla glisch duront la notg per carstgauns ed animals. *Giulia Berther* ha tematisau la vi-

vonda vegana cun la damonda «tendenza da moda ni dapli?». In dialog denter musica e sault ei vegnius presentaus da *Lilian Probst* e *Martin Simonet* ha tematisau igl «Abendmahl» da Da Vinci. Medemamein in tema da musica ha *Salome Cavegn* eligiu. Ell'ei seprofundada egl Oratori Elias da Felix Mendelssohn. Il student dalla China, *Bai Xingyu*, ei sefatschentaus dall'architettura el marcau

da Nanjing en China e *Ladina Vieli* ha priu sut la lupa l'Africa dil sid pli baul ed oz en connex cun l'apartheid.

... dalla tecnica e preparats

Interessanta ei era la presentaziun da *Cindy Furger* stada davart il tema «teoria e pratica da historias cuortas». Il svilup d'in cudisch per affons en collaboraziun cun ina classa da scoletta ei vegnius descrets da *Valeria Cathomen* ed *Anik Casutt* ei sefatschentada dalla commercialisaziun d'in canal da YouTube. En ina semeglionta direenziun ei la lavur da *Giuan-na Carabelli* ida, ell'ei sefatschentada dall'idea entochen la produenziun e la vendita d'in agen product. Dalla cosmetica el temps antic ei *Sina Darms* sefatschentada en sia lavur e *Natascha Bearth* ha tematisau igl effect da preparats d'alv d'iev sil svilup dallas musclas. *Niklas Demarmels* ha luvrau intensiv vid la damonda schebein igl ei pusseivel d'animar studentas e students als gimnasi d'emprender cun dapli plascher sin fundament da gamificaziun. *Lea Stern* ei sefatschentada d'in tema tut special davart «bulius e ratuns» ed *Aurelia Darms* ha intercoretg igl effect dalla midada dil clima sin cresta da crap.

En ina dallas proximas ediziuns presenta La Quotidiana entginas lavurs empau pli detagliadamein.



Giulia Berther ei sefatschentada en sia lavur da matura dil nutriment vegan. Ils visitaders da sia presentaziun han giu la caschun da degustar products vegans.

FOTO H. HUONDER